


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28




浙江圖書館

浙江圖書館



浙江圖書館



浙江圖書館

後漢紀序



晉東陽太守袁宏

予嘗讀後漢書煩穢雜亂睡而不能竟也聊以暇日
撰集爲後漢紀其所掇會漢紀謝承書司馬彪書華
嶠書謝忱書漢山陽公記漢靈獻起居注漢名臣奏
劾及諸郡耆舊先賢傳凡數百卷前史闕畧多不次
叙錯謬同異誰使正之經營八季疲而不能定頗有
傳者始見張璠所撰書其言漢末之事差詳故復探
而益之夫史傳之興所以通古今而篤名教也丘明
之作廣大悉備史遷剖判六家建立十書非徒記事
而已信足扶明義教網羅治體然未盡之班固源流

周贍近乎通人之作然因籍史遷無所甄明荀悅才智經綸足爲嘉史所述當世大得治功已矣然名教之本帝王高義韞而未叙今因前代遺事畧舉義教所歸庶以弘敷王道前史之闕古者方今不同其流亦異言行趣舍各以類書故觀其名迹想見其人丘明所以斟酌抑揚寄其高懷末吏區區注疏而已其所稱美止於事義疏外之意歿而不傳其遺風餘趣蔑如也今之史書或非古之人心恐千載之外所誣者多所以悵快躊躇操筆悵然者也

後漢光武皇帝紀卷第一



袁宏

孝景帝生長沙定王發武帝世諸侯得分封子弟以
冷道縣舂陵封發中子買爲舂陵節侯買生鬱林太
守外外生鉅鹿都尉回回生南頓令欽欽生光武皇
帝元帝時節侯之孫孝侯以南方旱濕請徙南陽於
是以蔡陽白水鄉爲舂陵侯封邑而與從昆弟鉅鹿
君及宗親俱徙焉湖陽人樊重女曰歸都自爲童兒
不正容不出於房南頓君聘焉生齊武王續魯哀王
仲世祖新野寧平公主

汝

世祖諱秀字文叔初南頓君爲濟陽令而世祖生夜
有赤光室中皆明使卜者筮之曰貴不可言是歲嘉

禾生縣界大熟因名曰秀爲人隆準日角大口美鬚
眉長七尺三寸樂施愛人勤於稼穡嘗之長安受尚
書大義畧舉兄縝字伯昇慷慨有大節王莽篡漢劉
氏抑廢常有興復之志不事產業傾身以結豪傑豪
傑以此歸之新野人鄧晨字偉卿家富於財晨少受
易好節義世祖與之善以姊妻之是爲新野公主世
祖與晨遊宛穰人蔡少公道術之士也言劉秀當爲
天子或曰是國師公劉子駿也世祖笑曰何知非僕
耶坐者皆笑當是時莽行一切之法犯罪輒斬之名
曰不順時令晨謂世祖曰王莽暴虐盛夏斬人此天
亡之時宛下言儻能應也世祖笑而不應宛人李通

字次元父守爲王莽宗卿師守身長八尺容貌絕異
治家與子孫如官府少事劉歆好星曆讖記之言云
漢當復興李氏爲輔私竊議之非一朝也通嘗爲吏
有能名見王莽政令凌遲挾父守所言又居家富佚
爲閭里豪自免歸從弟軼亦好事者謂通曰今四方
兵起王氏且亡劉氏當興南陽宗室獨有劉伯昇兄
弟汎愛衆可以謀大事通甚然之世祖常避吏於宛
通遣軼候世祖初通同母弟申屠臣善爲醫術以其
難使也續殺之故世祖不欲見軼軼輒來不止世祖
乃強見之軼徐達通意殊不以申屠臣爲恨世祖不
得已乃許之往時通病臥室內世祖與通兄儵弟寵

及軼語儵等喜悅並言天下兵起王氏亡敗之狀世祖初以士君子道相慕故往荅之及聞其語大驚不敢應起入室候通通握手極歡移日復言其兵起及識文世祖微難通曰即如是當如宗卿師何通曰已自有度世祖深知通意遂相結初琅邪呂母之子爲縣長所殺呂母家產數百金志欲報怨乃治酒多買刀兵少年隨其所乏而與之如此數歲財產單盡少年相與償母母滄泣曰所以相待非治產求利也欲以爲子報怨耳諸君寧能相哀也少年壯之又素被恩皆許諾聚衆數百人母自號將軍攻縣長及掾吏旣而解掾吏曰諸卿無罪唯欲報長耳諸吏叩頭爲

長請母曰吾子犯小罪不當死長殺之殺人當死又何請乎母遂手殺之以其首祭子墓自是莒人樊崇東宛人逢安東海人徐宣謝祿並爲盜賊一歲間衆各數萬人王莽沐陽侯田況大破之遂殘州郡所過抄掠百姓初崇等以困窮爲賊無攻城畧地之心結聚浸盛乃相與爲約殺人號令最尊者稱三老其次從事卒吏王莽遣平均公廉丹大師王匡東擊之軍至定陶莽詔丹曰倉廩盡矣府庫空矣可以怒矣可以戰矣丹惶恐夜召掾馮衍以書示之衍因說丹曰張良以五世相韓椎秦始皇於博浪之中勇冠乎貴育名高乎泰山將軍之先爲漢信臣新室之興英俊

不附今海內潰亂百姓塗炭民之思漢甚於詩人之
思邵公也愛其甘棠況其子孫民所歌舞天必從之
方今爲將軍計莫若先據大郡鎮撫吏士百里之內
牛酒日賜納雄傑之士詢忠智之謀興社稷之計除
萬民之害則福流於無窮勲著於不朽與其軍覆於
中原身分於草野功敗名滅所及先祖者哉聖人轉
禍而爲福智士因敗而爲功願明公深計而無與俗
同丹不能從進及睢陽復說丹曰蓋聞明者見於無
形智者慮於未萌况其昭哲者乎凡患生於所忽禍
發於細微敗不可悔時不可失公孫鞅曰有高人之
行負非於世有獨見之慮見疑於人故信庸庸之論

破金石之策襲當世之操失高明之德夫決者智之君也疑者事之役也時不重至公勿再計丹不聽行奉世曾孫也崇等欲戰恐其衆與莽兵亂乃皆朱眉以相識別由是號曰赤眉赤眉別校董憲等衆數萬人在梁郡匡丹攻拔無鹽莽遣中郎將奉璽書勞匡丹進爵爲公王匡故進擊憲廉丹以爲新拔城罷勞當且休士養威匡不聽引兵獨進丹隨之合戰成昌兵敗匡走丹使吏持其印鞞符節付匡曰小兒可走吾不可遂止戰死校尉汝雲王隆等二十餘人別鬪聞之皆曰廉公已死吾誰爲生馳奔賊皆戰死莽傷之下書曰惟公多擁選士精兵衆郡駿馬倉穀帑藏

皆得自調忽於詔策離其威節騎馬呵譟為狂刃所
害嗚呼哀哉賜謚曰果公國將褻章謂莽曰皇祖考
黃帝之時中黃直為將破殺蚩尤今臣居中黃直之
位願平山東莽遣章馳東與太師匡并力又遣大將
軍陽浚守敖倉司徒王尋將十餘萬屯雒陽填南宮
大司馬董忠養士習射中軍北壘大司空王邑兼三
公之職司徒尋初發長安宿霸昌殿亡其黃鉞尋士
房揚素狂直廼哭曰此經所謂喪其齊斧者也自効
去莽擊殺揚四方盜賊往往數萬人攻城邑殺二千
石以下太師王匡等戰數不利莽知天下潰畔事窮
計迫廼議遣風俗大夫司國憲等分行天下除井田

奴婢山澤六筦之禁即位以來詔令不便於民者皆收還之待見未發會世祖與通定謀議期以材官都試騎士日欲劫前隊大夫甄阜及屬正梁丘賜因以號令大衆乃使世祖與軼歸春陵舉兵以相應遣從兄子季之長安以事報父李守季於道病死守密知之欲亡歸素與邑人黃顯相善時顯爲中郎將聞之謂守曰今關門禁嚴君狀貌非凡將以此安之不如詣關自歸事旣未然脫可免禍守從其計即上書歸死章未及報畱闕下會事發覺通得士走莽聞之乃繫守於獄而黃顯爲請曰守聞子無狀不敢逃亡守義自信歸命宮闕臣顯願質守俱東曉說其子如遂

恃逆令守北向刎首以謝大恩莽然其書會前隊復
上通起兵之狀怒欲殺守顯爭之遂并被誅及守
家在長安者盡殺之南陽亦誅通兄弟門宗六十四
人皆焚屍宛市時劉縯召諸豪傑計議曰王莽暴虐
百姓分崩今枯旱連季兵革竝起此亦天亡之時復
高祖之業定萬世之秋也衆皆然之於是分遣親客
使鄧晨起新野世祖與李通李軼起於宛伯昇自發
舂陵子弟諸家子弟恐懼皆亡逃自匿曰伯昇殺我
及見世祖絳衣大冠皆驚曰謹厚者亦復爲之乃稍
自安凡得子弟七八千人部署賓客自稱柱天都部
使宗室劉嘉往誘新市平林兵與其帥王鳳陳牧等

合軍而進西擊長聚世祖初乘牛殺新野尉乃得馬
進屠唐子鄉殺湖陽尉軍中分財物不均衆恚恨欲
反攻諸劉世祖歛宗人所得物悉與之衆乃悅進拔
棘陽與莽前隊大夫甄阜屬正梁丘賜戰於小長安
漢軍大敗還保棘陽阜賜乘勝雷輜重藍鄉弘兵南
渡伯昇饗士設盟潛師夜襲藍鄉盡獲其輜重十一
月有星孛于張東南行五日不見孛星者惡氣所生
或謂之彗星張爲周分其後世祖都洛陽除穢布新
之象

更始元年正月斬阜賜死者萬餘人嚴尤陳茂聞阜
賜死馳欲據宛伯昇乃焚積聚破釜甑與茂戰於育

陽大破之斬首二千餘級尤茂走汝南漢兵遂圍宛
伯昇自號柱天將軍聖公稱更始將軍王莽惡之購
伯昇五萬戶黃金十萬斤使長安中諸宮署及天下
鄉亭皆畫伯昇像使旦起射之自臯賜死後降者十
餘萬無所統一諸將請立君南陽英雄及王常皆投
歸伯昇然漢兵以新市平林爲本其將帥起草野苟
樂放縱無爲國之畧皆憚伯昇而狎聖公二月辛巳
朱鮪等於濟水上設壇場立聖公爲天子議示諸將
伯昇曰諸公妄尊宗室甚厚無益然愚竊有所難聞
赤眉埒青徐衆數十萬其中必有諸劉若南陽有所
立此必將內爭王莽未滅而宗室相攻是疑天下而

自損權非所以破莽之道也且首兵唱號鮮有能遠
陳涉項羽是也春陵去宛纔三百里功德未有所施
遽自尊立爲天子準的後人將得承吾弊非計之善
者也爲將軍計不如且稱王王勢亦足以斬諸將今
赤眉所立者賢相率而往從之必不奪吾爵位如無
所立破莽降赤眉然後舉尊號亦未晚也諸將多曰
善可且爲更始王將軍張卞拔劔擊地曰疑事無功
今日之議不得有二乃立聖公聖公素懦弱流汗不
敢言以次拜諸將劉良爲國三老王匡爲定國上公
王鳳爲成國上公朱鮪爲大司馬劉續爲大司徒陳
牧爲大司空世祖爲太常卿餘皆九卿將軍改元爲

更始元年於是豪傑失望劉稷擊魯陽聞更始立怒曰本宗室謀討王莽復社稷者伯昇兄弟也更始何爲者不肯詣宛更始大臣不悅世祖惡之謂伯昇曰事欲不善伯昇笑曰怕如是耳李軼初與世祖善後諂新貴而疏世祖世祖誡伯昇曰此人不可親也伯昇不從平林兵圍新野不能下其宰潘臨登城曰願得劉公一信伯昇降之伯昇威名日盛更始君臣內不自安頃時詔示續七尺寶劍申屠建隨獻玉玦示樊宏曰昔鴻門之會范曾舉玦示項羽指在高祖建得無不善乎而續不應及世祖將至潁川復深誡伯昇三月世祖與諸將畧地潁川父城人馮異內鄉人

銚期潁陽人王霸襄城人傅俊棘陽人馬成皆從世
祖異字公孫通左氏春秋好孫子兵法爲郡功曹監
五縣事與父城令苗萌共守異出行屬縣爲漢兵所
得異曰老母在城中且一夫之用不足爲強願據五
城以効功世祖善之異歸謂萌曰觀諸將皆壯士屈
起如劉將軍非庸人也可以歸身死生同命萌曰願
從公計期字次況身長八尺二寸容貌壯異父卒期
行喪三年鄉里義之世祖聞其氣勇有志義召爲掾
霸字元伯家世獄官霸爲獄吏不樂文法慷慨有大
志其父奇之使學於長安數年歸會世祖過潁陽以
賓客見世祖曰聞將軍興義兵誅篡逆竊不自量貪

慕威德願克行伍故敢求見世祖曰今天下散亂兵革並興得士者昌失士者亡夢想賢士共成功業豈有二哉霸父謂霸曰吾老矣不任軍旅汝往勉之俊字子衛成字君遷以縣吏亭長從夏五月王莽遣大司徒王尋大司空王邑將四十萬兵號百萬衆至潁川嚴尤陳茂復與二公遇莽之遣二公也欲盛威武以震山東至賁猛獸車甲攻戰之具輜重千里世祖與下江新市平林兵數萬人擊之於陽關二公兵反走世祖入昆陽諸將惶怖各欲歸保所得城世祖曰昆陽即破一日之間諸將亦滅不同力救之反欲歸守妻子財物耶諸將怒曰劉將軍何以敢如此世祖

乃笑而去唯王常然世祖之計會候還言大兵來長
數百里不見頭尾頗至城北矣諸將乃遽更請劉將
軍計之世祖復爲陳相救之勢諸將素輕世祖及迫
急世祖爲畫成敗皆從所言時漢兵在城中者八九
千人世祖留王鳳王常守昆陽夜與宗佻李軼鄧晨
十三騎出城時二公至城下者且十萬人世祖幾不
得出嚴尤說王邑曰昆陽城小而堅今稱尊號者在
宛然進大兵向宛彼必奔走宛下兵敗昆陽自服邑
不聽遂環昆陽作營圍之數重雲車十餘丈旗幟蔽
野金鼓之聲聞數十里或爲地窟或作衝車弩射城
中如雨城中負戶以汲二公自以功在刻漏校尉司

後漢書卷九十一
馬請託郡縣取受賄賂不以軍事爲憂有流星墮營
中正晝有雲氣若壞山直於營而墮不及地尺而滅
吏士皆壓仆世祖旣至定陵晨悉發諸營精兵救昆
陽諸將戀輜重欲留兵守之世祖曰今同心併力以
破二公珍寶萬倍大功可成如爲所敗身首無餘何
財物之有諸將聞二公兵盛皆震懼世祖爲陳天命
曆數說其意請爲前行諸將不得已皆從世祖世祖
將步騎千餘人居諸將前二公遣步騎千餘人來合
戰斬首數十級諸將喜曰劉將軍平生見小敵怯今
見大敵勇甚可怪世祖復進諸將乘之斬首數百級
連戰輒勝諸將益奮棘陽人岑彭字君然以郡吏共

嚴說守宛城伯昇攻之數月城中相食是月岑彭嚴說舉城降諸將欲誅之伯昇曰彭爲郡吏執心堅守是其節也舉大事當表義士不如封之以勸後人更始乃封彭爲歸德侯更始入都太守府封宗室諸將皆爲列侯者百餘人宛城之拔昆陽未知也世祖爲書與城中言宛下兵復至昆陽墜其書二公得書恐六月己卯世祖選精兵三千從城西水上奔二公陣二公兵走北殺司徒王尋而昆陽城中兵亦鼓譟而出中外竝擊會大風雷雨渚水盛二公大眾遂潰奔走赴水溺死以數萬渚水爲之不流王邑嚴尤陳茂輕騎逃去漢軍獲其輜重車甲連月不盡或焚燒其

餘於是劉稷詣宛李軼等共譖之更始乃陳兵收稷
伯昇固爭之遂并殺伯昇以充祿勳劉賜爲大司徒
時世祖在父城乃詣宛謝之不伐昆陽之功更始以
是慙拜世祖爲破虜大將軍封武信侯秋八月故鍾
武侯劉望據汝南自立爲定漢王嚴尤陳茂皆歸之
王莽遣太師王匡國將襄章守洛陽以距更始更始
遣西屏將軍申屠建司直李松攻關定國王匡攻洛
陽三輔震動長安中兵起共攻莽九月丙子東海公
孫賓就斬莽首會申屠建李松至傳莽首及璽綬詣
宛更始視之曰莽不如是當與霍光等更始韓夫人
言云不如此者帝當那得之是月王匡亦拔洛陽執

太師公王匡國將裒章至宛斬之冬十月劉望自立
爲天子嚴尤爲大司馬陳茂爲丞相更始使劉信擊
之望兄子回殺望降嚴尤陳茂走朗陵爲故吏所殺
更始欲北之洛陽以世祖爲司隸校尉初三輔官府
吏東迎者見更始諸將數十輩皆冠幘而衣婦人衣
大爲長安所笑智者或亡入邊郡及司隸官屬至衣
冠制度皆如舊儀父老舊吏見之莫不垂涕悲喜曰
何幸今日又見漢官威儀更始至洛陽遣使降樊崇
等樊崇等與渠帥二十餘人至洛陽降皆封爲列侯
其留者相率叛之崇等即皆亡去復領其衆分爲二
隊崇自開封出南陽徐宣謝祿等從陽翟擊河南是

時豪傑竝起廬江張步起琅邪劉芳起安定董憲起東海秦豐起黎丘其餘赤眉銅馬青犢高湖董達等衆各數萬旬月之間天下皆遍隗囂字季孟天水成紀人少爲郡吏著名涼州季父崔豪俠能得衆情聞莽兵敗昆陽更始立於宛謀起兵以應漢囂止之曰兵凶事也宗族何辜崔不從收兵得數千人攻莽鎮夷大尹李育殺之旣而推囂爲主不得已乃聘平陵人方望爲軍帥望說囂曰今欲承天順民輔漢而立者乃在南陽莽尚據長安言爲漢無所受命何以見信於衆乎宜急立漢高廟稱臣奉祠所謂神道設教求助民神者也且禮有損益質文無常茅茨土階致

其肅也敬雖未備物神明其捨諸囂從其言遂立漢
祖宗廟祀畢相與盟曰凡我同盟允承天道興輔劉
宗或懷姦慮神明極之囂乃勒兵十萬將攻安定安
定太守王向莽從弟譚之子威行郡中屬縣未敢叛
囂喻向以天命向不從囂復爲言重頓兵血刃傷害
吏士終不聽乃進兵虜向以徇百姓然後行戮安定
悉降而長安中亦起兵誅莽囂遂分遣諸將徇隴西
武都金城武威張掖酒泉燉煌皆下之公孫述字子
陽茂陵人成帝時爲清水長兼治五縣姦不得發郡
中謂有神王莽時守導江卒正復有能名更始之立
南陽人宗成自稱將軍收兵漢中衆數萬人遂至成

都是時導江治臨邛述召縣中豪傑謂之曰天下同
苦新室思劉氏矣故聞漢將軍至馳迎道路今百姓
無辜父子俘獲室家燒燼此寇賊非義兵也吾欲執
郡自守以待真主諸公併力者即留不欲者即去豪
傑皆叩頭願効死乃發城中兵千餘人述使人詐稱
漢使者自東方來拜受印綬因號曰輔漢將軍兼益
州牧北至成都衆數千人遂攻宗成大破之盡有益
州李憲潁川人王莽時於廬江賊起衆至十餘萬莽
以憲爲偏將軍連年擊平之莽敗憲據郡守自稱淮
南王張步琅邪人漢兵起步亦聚衆千餘人擊攻傍
縣數十城劉芳安定三川人本姓盧王莽末天下咸

思漢芳由是詐自稱武帝後變姓名爲劉文伯及莽
敗芳與三川屬國羌胡起兵北邊董憲字儵卿東海
朐人父爲人所殺憲聚客報冤衆稍多遂攻屬縣秦
豐南郡黎鄉人少時受律令爲縣吏漢兵起與同鄉
蔡張趙京等起兵衆數千人攻宜城襄陽諸縣下之
自稱黎丘王更始封劉永爲舉王永故梁王子也王
莽時廢爲家人更始立詣洛陽故得封更始將使大
將平河北劉賜諸宗室無可使者獨有世祖也朱鮪
等以爲不可而左丞相曹競父子用事馮異勸世祖
厚結焉由是以世祖爲大司馬遣平河北於是馮異
銚期堅譚祭遵臧宮王霸皆以爲掾吏從至河北賓

客多去者世祖謂霸曰潁川從我者皆已亡矣疾風知勁草爾其勉之堅譚字子汲襄城人也以縣吏從世祖祭遵字弟孫潁陽人家富給而遵惡衣服不自修飾又好經學母死負土成墳以孝謹聞常為亭長所侵辱遵結客殺亭長縣中稱其儒而有勇也世祖破二公於昆陽還潁陽遵以縣吏數進見上愛其姿容謂遵曰欲從我乎曰願從因署門下吏臧宮字君翁邠人為縣亭長率賓客入下江兵中昆陽之戰諸將稱其勇世祖察宮勤力少言獨親納之初伯昇之遇害世祖不敢制服飲食笑言語如平常馮異見世祖獨居不御酒肉被席有涕泣處異獨寬解世祖世

祖曰卿勿妄言何有是乎異因曰天下同苦王氏思漢家今下江諸將縱橫恣意所至虜掠財物畧人婦女百姓已復失望無所戴矣今公專命方面廣施恩德有桀紂之亂乃見湯武之功民之饑渴易爲飲食時也宜急分遣官屬理冤結施恩惠於是乃遣異與銚期乘傳撫循百姓所至二千石長吏三老皆具食宥囚徒除苛政反漢官申舊章吏民大喜牛酒盈路皆辭而不受南陽新野人鄧禹字仲華少以德行稱嘗遊學長安見世祖知非常人也更始立人多薦舉禹不肯從聞世祖平河北乃杖策追之及世祖於鄴世祖見禹甚喜謂禹曰欲仕乎曰不願世祖曰即如

是欲何爲對曰使明公威德加於海內禹得効其尺
寸之功垂名竹素此其願也世祖留禹宿禹因進說
曰古人有言聖人不得違時時亦不可失也歷觀往
古聖明之興因時立功二科而已天事與人事也今
以天事觀之更始旣立而變方興人事觀之帝王大
業非凡夫所任更始旣是庸才而其輔佐無有忠良
明智深謀遠慮欲尊主安民者也以古人度觀之今
敗可見也公推誠接士摠覽英雄天下之人皆樂爲
驅馳公之德衆所歸也初戰昆陽破王莽四十萬衆
天下聞之莫不震靡公之武衆所服也軍政齊肅少
長有禮賞善如不及討惡如慮遙公之文衆所安也

聰明神武所謂天下聖人也民之歸治如水趨海以公之威德應民之望收天下英雄而分授之河內被山帶河足以爲固其土地富貴殷之舊都公之有此猶高祖之有關中也進兵定冀州北取幽并胡馬之用東舉青徐引負海之利三州旣集南面以號令天下天下不足定也上笑曰且相隨北去因勅左右號禹曰鄧將軍鉅鹿宋子人耿純字伯山說李軼曰將軍以龍虎之姿風雲之時奮迅而起暮月之間兄弟富貴德信不聞於士民功勞未施於百姓而寵祿暴興此智者之所忌也兢兢自危猶懼不終而況沛然自是成功者乎軼奇之乃授純節令安集趙魏

是時世祖在邯鄲純見世祖長者官屬齊肅遂求自
納焉南陽宛人朱祐字仲先世祖之舊也伯昇之起
以祐爲護軍伯昇敗祐常獨怨望世祖每短絕之祐
自洛陽將之河北劉嘉問祐曰子將何之祐曰將之
長安嘉素奇世祖知祐有舊謂祐曰子與劉公善胡
不北乎嘉有勞苦吏欲託之劉公祐曰若是願與之
俱乃給其車馬使賈復陳俊與祐俱北及世祖於栢
人世祖復以祐爲護軍常居中親幸祐從容問世祖
曰更始政亂公有日角之相天之所命也世祖怒將
收之乃不敢言賈復字君文南陽冠軍人初事武陰
李生李生奇之謂門人曰賈生容貌志氣如此而勤

於學將相之器也嘗爲縣吏迎塩河東會盜賊起同
輩十餘人皆棄塩去復獨送至縣縣中稱其信及漢
兵起復聚衆數百人於羽山旣而將其兵屬劉嘉爲
校尉復見更始綱紀日替令嘉遠爲之慮乃說嘉曰
臣聞圖堯舜之事而不能至者湯武是也圖湯武之
事而不能至者桓文是也圖桓文之事而不能至者
六國是也圖六國之事而不能至者亡六國是也今
漢氏中興大王以親戚爲輔天下未定而安所保所
保得無不可保乎嘉曰公言大非吾任也大司馬劉
公在河北可往投之去見上上復奇之又鄧禹亦稱
有將帥才於是署復爲都督解左驂以賜之陳俊字

子昭南陽西鄂人也少學長安歸爲郡吏漢兵起爲
劉嘉長史旣遇世祖調補曲陽長謂世祖曰欲與君
爲左右小縣長何足以留之俊卽解印綬去世祖以
俊爲疆弩將軍將中堅士俊教習進退皆應旗鼓臨
敵奮擊所向皆破世祖曰諸將皆如此復何憂哉王
昌字郎邯鄲人初河間赤眉大衆將至百姓騷動郎
明星曆以爲河北有天子氣素與趙繆王子林善豪
俠於趙欲因此起兵初王莽時或稱成帝子子輿爲
莽殺之郎於是詐稱子輿以誑動林等林等亦欲以
爲亂乃與趙國大豪李育張參先宣言赤眉將至立
劉子輿以動衆心遂率車騎數百晨入邯鄲止王宮

十二月壬辰郎自立爲天子外遣將帥徇幽冀曰朕
孝成皇帝子子輿者也遭趙氏之禍王莽篡弑賴知
命者將護朕躬解形河濱削迹趙魏王莽竊位獲罪
于天命祐漢故使東郡太守翟義嚴鄉侯劉信擁
兵征討出入胡漢普天率土知朕隱在人間今也南
嶽諸劉爲朕先驅朕觀天文乃興于斯而聖公未知
故且持帝號今已詔聖公及翟太守驟與功臣詣行
在所荊州刺史太守皆聖公翟義所置強者負力弱
者疑惑頓兵傷士元元喪氣朕甚悼焉故遣使者頒
下詔書是時百姓思漢言翟義不死故郎稱之從民
望也於是自趙國已東至于遼左皆從風而靡矣茂

陵人耿弇字伯昭父况王莽時爲朔調連率更始立
諸將畧地者前後非一弇乃辭况至京師因獻貢以
自固弇時年二十一矣至宋子會王郎反從縣吏孫
倉衛苞勸弇降邯鄲弇按劍叱之曰所以涉難至長
安者欲以輔劉氏也今我至京師陳上谷漁陽兵馬
之用還出太原代郡反覆數十日歸發突騎以奔烏
合之衆如摧枯折腐耳觀公等族滅不久孫倉衛苞
不從皆亡去弇聞世祖在盧奴乃北謁之世祖置弇
門下吏弇因護軍朱祐求歸發兵世祖壯之弇亦書
與况盛陳世祖畧宜速來相見况乃馳至昌平遣
小子舒獻馬焉

後漢光武皇帝紀卷第一

浙江圖書館

浙江圖書館

卷一

浙江圖書館

浙江圖書館

後漢光武皇帝紀卷第二

袁宏

二年春正月公到薊王郎購公十萬戶薊中驚恐言郎使者方至太守已下皆出城迎公見官屬議耿弇曰今兵從南方來不可南行上谷太守耿況漁陽太守彭寵公邑人也發此兩都控弦強弩萬騎所向無前邯鄲不足平也公曰卿言善時公官屬盡南方人莫有欲北者皆曰死南首柰何北行公指弇曰是我北道主人公駕出官屬不盡相及弇與公相失道路擾攘皆欲擊公鈹期奮戟在前噴目叱之至城門已閉矣攻之得出兼晨夜蒙霜雪所過城邑不敢入或絕日不食至饒陽蕪婁亭馮異進豆粥公曰得公孫

豆粥饑寒俱解公將出或曰閉之亭長曰天下詎可
知何閉長者爲遂南行至呼沱河導吏還言河水流
漸無船不可渡官屬皆失色公遣王霸視之信然霸
恐驚衆不可渡且前依水爲阻卽言冰堅可渡士衆
大喜比至冰合可涉旣渡公謂霸曰安吾衆令渡者
卿力也霸曰此明公至德神靈之祐雖武王渡河白
魚之應無以加也公曰王霸權時以安衆是天瑞也
爲善不賞無以勸後以霸爲軍正賜爵關內侯於是
未知所之有老公在道旁曰信都爲長安城守去此
八十里乃至信都太守任光都尉李忠聞世祖至開
門出迎世祖見光喜曰伯卿兵少不足用如何光曰

可發奔命攻旁縣不降者掠之兵貪財物可大致也
以光爲左大將軍封武成侯忠爲右大將軍封武固
侯光字伯卿南陽宛人好黃老言爲人純厚鄉里愛
之知漢兵至宛或見光衣服鮮明欲殺之解衣未已
會安城侯劉賜適至見光容貌長者救全之因率黨
與從賜爲偏將軍與世祖共破二公於昆陽後更始
拜光爲信都太守李忠字仲卿東萊人以好禮稱王
莽時爲信都都尉更始立以忠郡中爲所敬信即拜
忠爲都尉兼重書勞勉焉王郎起光與忠發兵固守
廷掾有持郎檄詣府者光斬之以令百姓邳彤字偉
君信都人王莽時分鉅鹿爲和成郡以彤爲郡卒正

公之平河北彤舉城降復以彤爲太守是時郡縣得
王郎檄皆望風嚮應唯信都和成二郡不降彤聞公
來失衆使五官掾張萬將精騎二千詣公所彤與公
會信都議者或言可因信都兵自送入關彤庭對曰
議者之言皆非也何者吏民思漢久矣故更始之立
天下嚮應當此之時一夫大呼無不捐城遁逃虜伏
請降自古已來用兵之盛未有如此者也邯鄲劉
胡子等假此威勢惑亂吏民詐以卜者王郎爲成帝
子擁而立之其衆烏合無有根本之固明公奮二郡
之兵揚嚮應之威以攻則何城不剋以戰則何軍不
服今釋此而西歸非徒亡失河北又驚動三輔其隳

損威重安可量也明公審無征伐之計則雖信都之
衆難可合也何者明公西則邯鄲和成民不肯捐棄
和成而千里送公其離散逃亡誠可必見以彤爲後
大將軍世祖使宗廣守信都李忠邳彤征伐耿純率
宗族二百餘人老者載棺而隨之及賓客二千人拜
衣襦迎公於貫鉅鹿人劉植亦率賓客數十人開城
門迎公大悅以純爲前將軍植爲驍騎將軍衆益盛
乃渡呼沱攻中山所過郡縣望風影附耿純使從弟
訢歸燒宗室廬舍公以問純純曰竊見明公單車臨
河北非有府藏之畜重賞甘餌以聚人者也接下以
至誠待之以恩德是以士衆旁來思樂僵仆今邯鄲

自立北州疑惑純雖舉宗歸命老弱克行猶恐宗人
賓客卒有異心無以自固燔燒廬舍絕其反顧之望
公善之更始將相皆山東人也咸勸更始都洛陽丞
相長史鄭興說更始曰陛下起自荆楚無施於民舉
號南陽而雄傑已誅王莽開門而迎者何也若王氏
思高祖之舊德也今不久撫之臣恐百姓心動盜賊
復起議者欲平赤眉而後入關是不守其本而爭其
末也恐國家之守轉在函谷雖臥洛陽得安枕邪更
始曰朕西決矣乃以興爲梁州刺史二月更始西至
長安自王莽之敗西宮燔燒東官府市里太倉武庫
皆如故更始居於東宮郎吏以次侍更始媿不能視

諸將後至者更始勞之曰掠得幾返左右大驚李松
趙萌說更始宜立諸功臣爲王以報其功朱鮪以爲
高祖之約非劉氏不得王更始乃先封宗室劉祉爲
定陶王劉賜爲宛王劉慶爲燕王劉弇爲元氏王劉
嘉爲漢中王後遂立王匡爲比陽王王鳳爲宜城王
朱鮪爲膠東王張卬爲灌陽王王常爲鄧王廖湛爲
殷王申屠立爲平民王胡殷爲隨王李通爲西平王
李軼爲武陰王成丹爲襄邑王陳茂爲陰平王宋佻
爲潁陰王以李松爲丞相趙萌爲大司馬隗囂爲御
史大夫即拜張步爲輔漢大將軍步弟弘爲衛將軍
藍玄武將軍壽高密太守步乃分兵畧地盡得琅邪

泰山城陽東萊高密膠東北海齊郡濟南拜董憲爲
臨淮太守憲還東海攻利城耿况攻曲陽皆下之拜
劉芳爲騎都尉使鎮撫安定以西更始以趙萌女爲
夫人有寵委政於萌更始曰在後宮與婦女飲酒諸
將欲言事更始醉不能見請者數來不得已令侍中
於帷中與語諸將又識非更始聲皆怨曰天下未可
知欲見不得而韓夫人尤嗜酒手自滴酒謂常侍曰
帝方對我樂飲間時多正用飲時卽事來爲起抵書
按破之議郎有諫者言萌放縱縣官但用趙氏家語
署耳更始怒拔劍斫議郎時御史大夫隗囂在旁起
謂左右曰無漏泄省中事萌嘗以私事扶侍中下斬

之侍中呼曰陛下救我更始言大司馬哀縱之萌曰
臣不奉詔遂斬之如此者數李軼等擅命於外所置
牧守交錯州郡不知所從強者爲苦王匡張卬之屬
橫暴長安三輔苦之又所署官爵多群小長安爲之
語曰竈下養中郎將爛羊胃騎都尉由是四方不信
豪傑離心博士李淑諫曰方今賊臣始誅王化未行
百官有司宜得其人陛下本因下江平林之勢假以
成業斯亦臨時之宜事定之後宜釐改制度更延英
俊以匡王國今者公卿尚書皆戎陣亭長凡庸之隸
而當輔佐之任望其有益猶緣木求魚終無所獲海
內望此知漢祚未興臣非有憎疾以求進也但爲陛

下惜此舉措願陛下更選英彥以克廊廟永隆周文
濟濟之盛更始怒收淑繫之詔獄歷年至更始之敗
乃免初隗囂被徵將行方望止之曰更始未可保且
觀百姓所歸囂不聽以書謝囂曰足下將建伊呂之
業任存亡之權大事草創雄傑未集以望異域之人
疵瑕未曝於衆可且依託亦有所宗望知大指順風
不讓幸賴將軍尊賢廣謀動有功發中權基業已定
英傑雲集思爲羽翮比肩是也望久以羈旅抱空資
託賓客之上誠自媿也假望懷介然之節潔去就之
分又不貳其志矣何則范蠡收績於姑蘇狐犯謝罪
於始入夫以二子之勤從君二十餘年蠡苞七術之

機犯爲舅氏之親然至際會猶釋罪削迹請命乞身
蓋亦宜也望聞烏氏有龍池之山微徑南通與漢相
連其旁有奇人聊及閑暇廣求其真願將軍勉之而
已囂固留望遂去囂詣長安更始以囂爲右將軍季
父崔爲白虎將軍義爲左將軍旣而崔義謀叛西歸
囂懼其并誅即求見而告其謀二人誅死更始以囂
爲忠故以爲御史大夫方望旣去隗囂遂說安陵人
弓林曰更始必敗劉氏真人當受命劉嬰本當嗣孝
平帝王莽以嬰爲孺子依託周公以奪其位以爲安
定公今在民間此當是也林等信之於長安求得嬰
將至臨涇聚黨數千人立嬰爲天子望爲丞相林爲

大司馬更始遣李松蘇茂等擊皆斬之公之擊趙國引兵入鉅鹿降廣阿更始初立遣使徇諸國曰先降者復爵位上谷太守耿況出迎使者上印綬使者無還意功曹寇恂勒兵入請印綬使者曰天王使者功曹欲脅之恂曰非敢脅使君竊傷計之不詳也今天下初定國信未宣使君立節銜命以臨四方郡國莫不延頸傾耳望風歸命今至上谷而隳阻向化之心生離叛之隙何以復令他郡乎且耿況在上谷久爲吏民所親今易之得賢則造次未安不賢則爲亂爲使君計莫若復况以安上谷外以宣恩信使者不應恂因顧叱左右以使者教召况况至恂前取印綬

帶況使者不得已承認授之況遂拜受而出恂字子翼上谷北平人也家世爲郡縣之著姓恂好學爲郡功曹耿況甚重之時王郎使上谷發兵恂與門下掾閔業議邯鄲拔起不可信王莽末時所難伯昇今聞大司馬伯昇親弟尊賢下士所至見說可歸附也況曰邯鄲兵強不能獨距如何對曰今據大郡悉舉其衆控弦萬騎可以詳擇去就恂請束約漁陽太守與合爲一邯鄲不足圖也耿昇之與公相失也聞行歸上谷會適至勸況發兵乃遣寇恂至漁陽說太守彭寵初吳漢說寵曰漁陽上谷突騎天下所聞也君何不率勉上谷共遣精銳以詣劉公并力擊邯鄲此一

時之功也護軍蓋延狐奴令王梁亦勸寵寵欲從之其官屬不聽漢知寵不得自專乃辭去城外思所以調其衆者時道多饑民見一諸生漢使人召之乃問所聞見此生具說劉公所過爲郡縣所稱言邯鄲劉子輿非劉氏也漢乃獨爲檄發漁陽兵使此生奉檄詣寵寵官屬皆疑會恂至寵遂發兵以漢行長史事與都尉嚴宣護軍蓋延王梁等將步騎三千人共攻薊誅王郎大將趙闔等所過攻下郡邑誅其將帥將及廣阿聞城中車騎甚衆漢乃勒兵問曰此何兵曰大司馬公也時王郎亦遣大司馬畧地漢復問曰大司馬爲何公也對曰劉公也漢聞之喜即進兵城下

初聞二郡兵且至或云王郎來甚憂之及聞外有大兵公親乘城勒兵傳問之漢等答曰上谷兵爲劉公諸部莫不喜躍耿弇得所歸附矣耿弇拜於城下具言發兵狀公廼悉召入咲曰邯鄲將帥數言我發漢陽上谷兵吾聊應一言我亦發之何意二郡良爲吾來方與士大夫共此功名耳乃皆以爲偏將軍加況寵大將軍封列侯吳漢爲人質厚少文造次不能以辭自達然沈勇有智畧鄧禹及諸將多知之數相薦舉乃得召見遂見親信常居門下更始遣尚書令謝躬率六將軍討王郎不能下王郎遣將攻信都信都大姓馬寵等開城內之收太守宗廣及武固侯李忠

母妻而令親屬招呼忠時寵弟從忠爲校尉忠即時
召見責數以背恩反城因格殺之諸將皆驚曰家屬
在手中殺其弟何猛也忠曰若縱賊不誅則二心
也公聞而美之謂忠曰今吾兵已成矣將軍可歸救
老母妻子宜自募吏民能得家屬者賜錢千萬來從
我取忠曰蒙明公大恩思得效命誠不敢內顧宗親
郎所置信都王捕繫後大將軍邳彤父弟及妻子使
爲手書呼彤曰降者封爵不降族滅彤涕泣報曰事
君者不得顧家彤親屬所以至今得安於信都者劉
公之恩也公方爭國事彤不得復念私也公乃使左
大將軍任光將兵救信都光兵於道散降王郎無功

而還會更始所遣將攻拔信都敗走王郎兵忠彤家屬悉全公因使忠行太守事還歸信都誅郡中反者數百人公東擊鉅鹿未下耿純說公曰守鉅鹿士衆疲弊雖屠其城邯鄲存不如以精銳擊邯鄲若王郎已誅鉅鹿不戰自服矣公從之夏四月攻邯鄲王郎使杜威持節詣軍威曰實成帝遺體子也公曰設使成帝復生天下亦不可得也況詐子與者乎威固請降求萬戶侯公曰一戶不可顧得全身耳威曰邯鄲雖鄙并力城守尚曠日月終不君臣俱降但欲全身也乃辭去少傅李立反開城門五月甲辰破邯鄲誅王郎公得文書謗毀公者皆燒之曰令反側子自安

也。更始遣使封公爲蕭王，令罷兵。將有功者，詣行在所，遣幽州牧苗曾之部王辛溫、明殿耿弇，請問曰：「吏士死傷者多，願歸上谷益兵。」王曰：「王郎已破河北，畧平國家，今都長安，天下大定，復用兵何爲？」弇曰：「王郎雖破天下，兵革乃始耳。今使者來欲罷兵，不聽也。銅馬、赤眉之屬數千萬人，所向無前，聖公不能辦也。敗必不久。」王曰：「卿勿妄言，我告斬卿。」弇曰：「大王哀厚，弇如父子，故敢披赤心。」王曰：「我戲卿耳，何以言之？」弇曰：「百姓患苦王莽，復思劉氏，聞漢兵起，莫不歡喜。從風如去虎口，得歸慈母，倒戟橫矢，不足以喻。更始未都長安時，百姓未具責也。今都長安，卽位宮室，成以爲

天子而大臣專權貴戚縱橫夫政令不出城諸將虜掠甚於賊盜百姓愁怨天下失望是以知必敗也明公首事南陽破昆陽下百萬衆今復定河北以義征伐表善懲惡躬自尅薄發號嚮應望風而至天下至重公可自取無令他往得之王曰卿得無爲人道之弇曰此重事不敢爲人道於是王謂鄧禹曰吾欲取幽州突騎誰可使者禹曰吳漢文能柔未附武足斷大事可用也乃以漢爲大將軍持節與耿弇發幽州十郡兵幽州牧苗曾不肯調漢將二十騎至無終曾以漢無備出迎漢漢麾騎收曾即誅之遂取其軍威振北州漢將兵詣王所諸將望見漢還兵馬甚盛皆

曰此欲自將之何肯與人及漢至上公簿請所付諸將各多請之王曰屬者恐其不與人今所請又何多也諸將由是服焉秋王擊銅馬於清陽破之又擊高明董連大破之衆十餘萬悉降皆封其渠帥諸將未能信賊賊示二其心王勅降賊各勒兵王將輕騎入其營渠帥曰王推赤心置人腹中安得不投死由是遂安悉以賊配諸將營更始柱功侯李寶益州刺史張忠徇益州公孫述使弟將兵要之綿竹大破寶忠由是威振益州功曹李熊說述曰方今四海震盪匹夫橫議將軍割據千里地十湯武奮發威德以投天隙王霸之業成矣宜改名以鎮百姓述以爲然乃自

立爲蜀王遣將軍侯丹守白水關任滿據扞關蜀地
肥饒民強兵實遠方多歸之邛人長貴殺王莽越雋
太守自立爲邛穀王稱臣於述塞外君長皆貢述更
始武陰主李軼據洛陽尚書謝躬據鄴各十餘萬王
患焉將取河內以追之謂鄧禹曰卿言吾之有河內
猶高祖之有關中關中人非蕭何誰能之使一方晏
然高祖無西顧之憂者矣吳漢之能卿之舉矣復爲
吾舉蕭何禹曰寇恂才兼文武有御衆才非恂莫可
安河內也王至河內太守韓歆謀將城守備武人衛
文多竒計馮異素知之異言於王使衛文說歆令降
岑彭亦勸歆遂從之王以歆不即降置之鼓下將斬

之彭在城內使人召彭初彭賴伯昇獲免因以兵屬伯昇被害更爲朱鮪校尉後爲潁川太守將之官道不通乃將麾下數百人從邑人韓歆於河內彭見王曰赤眉入關更始危殆四方蜂起羣雄競逐竊聞大王開拓河北此誠皇天祐漢士民之福也彭賴司徒公得全濟今復遇大王誠願出身自効以報恩施王深納之因言歆南陽人可以爲用乃赦之於是以馮異爲孟津將軍寇恂爲河內太守王謂恂曰河內富實帶河爲固北通上黨南迫洛陽吾將因是以濟高祖留蕭何守關中吾令委卿以河內恂乃伐其園竹以爲兵矢收淇租賦以給年糧養馬二千匹以供軍

用劉隆字元伯王之宗人更始初爲偏將軍預於昆陽之戰更始入關請迎妻子至洛陽聞主在河北隆單身歸王王以爲騎都尉使與馮異守洛陽李軼聞隆歸王乃盡殺隆妻子河北旣定遣吳漢岑彭擊謝躬時拒五校於隆慮令大將軍劉慶守鄴城漢說魏郡太守陳康曰上智處危以求安中智因危以爲功下愚安危以自亡危亡之至在人所由不可不察今京都敗亂四方雲擾劉公所向輒平之公所見也謝尚書不量力內與蕭王違戾外失河北之心公所知也公據孤危之城堅守自安以待滅亡義無所立節無所成不若開門內軍轉禍爲福免下愚之危收中

智之功此計之至者也於是陳康乃收劉慶及躬妻子開門內漢軍躬聞漢等至將輕騎歸不知漢已得其城與數百騎夜至鄴時漢在城外彭在城中開門內躬脅將詣傳斬之初更始遣躬將馬武等六將軍與世祖俱定河北及王郎平躬與世祖復俱共在邯鄲中不居城內躬所領諸將多放縱爲百姓所苦躬不能整又數與王違戾常欲襲之以爲兵強故止然躬勤於吏事每至所在理冤結決詞訟王常稱之曰謝尚書真吏也躬由此不自疑躬妻子嘗誡之曰終爲劉公所制焉馬武字子張南陽湖陽人少時避怨綠林中起隨擊甄阜二公兵故王常親引之邯鄲旣

平王登臺從容謂武曰吾得渙陽上谷突騎欲令將
軍主之何如武讓不敢當然歸心於王武旣降置之
帳下每饗諸將武斟酌於前自以新屬也甚卑恭不
敢與南陽時等王善之冬十二月赤眉西入關更始
定國上公王匡襄邑王成丹抗威王劉均據河東丞
相李松大司馬朱鮪據弘農拒之王度長安必危方
憂山東關西未有所屬乃以鄧禹爲前將軍中分軍
西入關以韓歆爲軍帥李文程憲李春爲祭酒馮愔
爲積弩將軍樊崇爲驍騎將軍宗歆爲大將軍鄧尋
爲建武將軍耿訢爲赤眉將軍左于爲軍師戎士二
萬王送鄧禹於野王王反而獵於道見二人者卽禽

王曰禽何向二人舉手西指曰此中多虎臣每即禽
虎亦即臣大王勿往也王曰苟有備虎何患二人曰
何大王之謬也昔湯即桀於鳴條而大城於亳其備
非不深也武王即紂而殺之故即人者人亦即之雖
有重備豈能自守乎王不自得顧謂左右曰此隱者
也將之乃不辭而俱去

圖

浙江

後漢光武皇帝紀卷第二

後漢光武皇帝紀卷第三

袁宏

建武元年春正月鄧禹攻安邑王匡成丹劉均等合
兵十餘萬共擊禹禹與戰不利驍騎將軍樊崇臨陣
死會日暮兵疲韓歆及諸將見戰敗而敵盛皆諫禹
欲夜去禹不聽明日癸丑匡等以六甲窮日不出禹
得益治兵勅軍中曰匡等雖出無妄動令至營下乃
擊匡等悉至禹鼓而竝進大破之斬劉均河東太守
楊寶遂定河東禹承制拜軍祭酒李文爲太守悉更
置令鎮撫之王擊銅馬於元氏使耿弇吳漢將精兵
在前大破之追至慎水北漢兵乘勝薄之賊皆殊戰
漢軍大壞王親揮刃以禦賊未交鋒耿弇射之賊不

得前岸高不得上王自投馬下值突騎王豐豐以馬授王王撫豐肩曰幾爲賊所突馬武在後戰甚用力故賊不得進軍士奔散者先保范陽或言王已沒矣軍中恐懼不知所爲吳漢曰王兄子在南陽何憂有頃王至衆乃復振夜賊引去王退入漁陽破之吳漢別追至右北平斬首三千餘級更始遣廩丘王田立大司馬朱鮪白虎公陳僑將三十萬衆助李軼守洛陽馮異與李軼書曰愚聞明鏡所以照形往事所以知今也昔微子去殷而入周項伯叛楚而歸漢周勃迎代王而黜少帝霍光尊孝宣而廢昌邑彼皆畏天知命重祖宗而憂萬民覩存亡之符効見廢興之必

然故能成功於一時垂業於萬世今長安壞亂赤眉
在郊王侯構難大臣分離朝無紀綱而四方分崩異
姓竝起此劉氏之憂也故蕭王跋涉霜雪躬當矢石
經營河北英俊雲集百姓歸往函岐見慕不足爲喻
今馬子張皆復親幸爵位如此謝躬違戾伏辜如彼
又明效也季文誠能覺悟亟斷大計論功古人轉禍
爲福在此時矣如猛將長驅嚴兵圍城雖有悔恨亦
無及已矣初軼譖害伯昇欲降而不自安冀王開納
之乃報異書曰軼本與蕭王首謀造漢約結死生避
逅中道別離今軼守洛陽將軍鎮孟津俱據機軸千
載一會思成斷金唯有深達蕭王冀得進愚策以得

佐國安人異奏軼書王報異曰季文多詐人不能得其要領今移其書告守尉當警備者衆以軼擁大衆據名都欲有降意怪上露之也軼書旣布朱鮪得其書使人殺軼雒陽大衆乖離多出降者蕭王之北朱鮪使蘇茂將三萬人渡河襲溫鮪自將數萬人攻平陰寇恂乃發屬縣兵令與恂會溫軍吏皆諫曰洛陽兵渡河前後不絕宜待衆兵畢至乃可擊之恂曰溫者郡之落蔽如失溫郡不可得守也遂馳赴之明日陳兵未合而馮異適至恂乃令士卒乘城鼓噪曰公兵至茂陣動因奔擊大破之茂兵自投河死者過半斬其副將賈強遂乘勝渡河環洛陽城乃還自是洛

陽震恐城門晝閉初傳聞朱鮪破河內有頃恂檄至上大喜曰吾知寇子翼可任也三月李松與赤眉戰於務鄉松大敗李熊說公孫述曰山東饑饉人民相食百姓塗炭城邑丘墟今蜀土豐沃稼穡嘗熟果實所生不穀而飽女工之業覆衣天下陸有器械之用水浮轉漕之便北據漢中杜褒斜之險東守巴郡拒扞關之口地方數千里戰士百萬見利則出兵而畧地無利則堅守而力農東浮漢水以闚秦地南順江流以震荆揚所謂用天因地成功之資也今君王之聲聞於天下號位不定志士狐疑宜即大位使遠人有知述然其言有龍出府殿中夜有光述以爲符瑞

夏四月公孫述自立爲天子廣漢人李業字巨遊嘗爲郎王莽居攝謝病去不應辟召隱迹山谷述素聞業名欲以爲博士因辭病不起述羞不致業乃遣大鴻臚尹融奉詔持醵曰業起則授大位不起則賜醵融喻業曰今天下三分孰非孰是何爲區區身投不測之泉朝廷募名德於子厚矣宜上奉知己下爲妻子計之身名俱全不亦優乎今阻疑衆心凶禍立加非計之得者也業乃歎曰危邦不入亂邦不居蓋爲此也君子見危授命何可誘以高位哉融見持心彌堅復曰宜呼室家計之業曰丈夫內斷於心久矣何妻子之爲乎遂仰醵而死

袁宏曰夫名者心志之標榜也故行著一家一家稱
焉德播一鄉一鄉舉焉故博愛之謂仁辨惑之謂智
犯難之謂勇因實立名未有殊其本者也太上遵理
以修實理著而名流其次存名以爲己故立名而物
懟最下託名以勝物故名盛而害深故君子之人洗
心行道唯恐德之不修義之不高崇善非以求名而
名彰於外去惡非以邀譽而譽宣於外夫然故名盛
而人莫之害譽高而世莫之爭末世陵遲大路巖險
雖持誠行已不求聞達而讒勝道消民怨其上懼令
名之格物或伐賢以示威假仁義以濟欲或禮賢以
自重於是有顛沛而不得其死屈辱而不獲其所此

又賢人君子所宜深識遠鑒退藏於密者也易曰无咎無譽衰世之道也若夫潔已而不汙其操守善而不遷其業存亡若一滅身不悔者此亦貞操之士也嗚呼大道之行萬物與聖賢並通及其衰也君子不得其死哀哉更始諸將懼赤眉至申屠建等御史大夫隗囂共勸更始讓帝位更始不應建等謀劫更始未行其計侍中劉能卿知其謀告之更始召申屠建斬之張卬廖湛胡殷於是自爲王勒兵燒宮門隗囂將賓客奔天水更始與三王戰宮中不勝將妻子車騎百餘人東至新豐從大司馬趙萌萌以爲王匡陳收成丹皆與三王有謀可收斬之更始乃召陳收成

丹即斬之王匡不應召因并將收丹兵歸長安從三
王於太子宮趙萌李松亦將其衆從更始於太倉中
五月蕭王自漁陽過范陽命收葬士卒死者至中山
羣臣上尊號曰大王初征昆陽則王莽敗亡後伏邯
鄲則北州平定此豈人力哉三分天下而有其二跨
州據土帶甲百萬武功論之無所與爭文德論之無
所與讓宜正號位爲杜稷計王不聽諸將固請王曰
寇賊未平四面受敵何遽欲正位號乎諸將出耿純
進曰天下士大夫捐親戚棄土壤從大王於矢石之
間者其計固望攀龍鱗附鳳翼以成其志耳今功業
已定天時人事已可知矣而大王留時逆衆不正位

號純恐士大夫望絕計窮則有去歸之思無從大王
也王感其言使馮異問以羣臣之議異至曰三王背
叛更始敗亡天下無主宗廟之憂在於大王宜從衆
議上以安社稷下以濟百姓王曰我昨夢乘赤龍上
天覺悟心中悸動此何祥也異再拜賀曰此天帝命
發於精神心中悸動大王重慎之至也會諸生強華
自長安奉赤伏符詣鄗羣臣復請曰受命之符入應
爲大今萬里合信周之白魚焉足比乎符瑞昭哲宜
答天神以充上帝六月己未即皇帝位于鄗改年爲
建武元年大赦天下改鄗爲高邑

袁宏曰夫天生蒸民而樹之君所以司牧羣黎而爲

謀主故權其所重而明之則帝王之畧也因其所弘而申之則風化之本也夫以天下之大羣生之衆舉一賢而加于民上豈以資其私寵養其厚大將開物成務正其性命經綸會通濟其所欲故立君之道有仁有義夫崇長推仁自然之理也好治惡亂萬物之心也推仁則道足者宜君惡亂則兼濟者必王故上古之世民心純朴唯賢是授揖讓而治此蓋本乎天理君以德建者也夫愛敬忠信出乎情性者也故因其愛敬則親疎尊卑之義彰焉因其忠信而存本懷舊之節著焉有尊有親則名器崇矣有本有舊則風教固矣是以中古之世繼體相承服膺名教而仁心

不二此又因於物性君以義立者也然則立君之道
唯德與義一民之心莫大於斯先王所以維持天下
同民之極陳之千載不易之道昔周秦之末四海鼎
沸義心絕於姬氏干戈加於嬴族天下無君六合無
主將求一時之傑以成撥亂之功必推百姓所與以
執萬乘之柄雖名如義帝強若西楚焉得擬議斯事
乎由是觀之則高祖之有天下以德而建矣逮於成
哀之間國嗣三絕王莽乘權竊有神器然繼體之政
未爲失民劉氏德澤實繫物心故立其寢廟百姓覩
而懷舊正其衣冠父老見而垂泣其感德存念如此
之深也如彼王郎盧芳臧獲之儔耳一假名號百姓

爲之雲集而况劉氏之胄乎于斯時也君以義立然則更始之起乘義而動號令稟乎一人爵命班乎天下及定咸陽而臨四海清舊宮而饗宗廟成爲君矣世祖經畧受節而出奉辭征伐臣道足矣然則三王作亂勤王之師不至長安猶存建武之號已立雖南面而有天下以爲道未盡也初赤眉二道入關至弘農復大合分其衆萬人爲一營軍中嘗有齊巫祠城陽景王巫言景王大怒當爲縣官則可何故爲盜賊有災巫言輒病方望弟陽怨更始殺其兄乃說樊崇等曰更始荒亂政令不行將軍擁百萬之衆西向帝城而無稱號且爲羣賊不可以久不如挾宗室以行

誅伐不敢不服崇等然之又迫於巫言乃求景王後
得七十餘人唯盆子最親是月赤眉立盆子爲天子
盆子年十五被髮徒跣見衆人拜恐怖欲啼崇等自
相署置崇本先起有勇力方畧自徐宣等皆宗之然
不能書徐宣故獄吏通易經於是推宣爲丞相崇爲
御史大夫盆子者故式侯萌子王莽時廢爲家人更
始過式畧盆子與二兄恭茂俱在軍中更始之詣洛
陽恭隨見南宮恭前頓首曰故式侯世子大漢復興
聖主在堂不勝歡喜願上壽有詔引上殿稱壽曰九
族旣睦平章百姓更始愧之即封爲式侯恭通尚書
以明經數幸言事擢爲侍中從更始入關茂與盆子

留赤眉中嘗爲劉俠卿牧牛盆子旣立猶朝夕拜俠
卿俠卿爲之跪後祠景王於郭北使盆子乘鮮車大
馬草中牧兒皆隨車觀曰盆子在是中至祠所盆子
拜崇等皆爲之拜祠罷復歸俠卿所時欲出從牧兒
戲俠卿怒止崇等亦不復候視也秋七月辛未前將
軍鄧禹爲大司徒封鄼侯野王令王梁爲大司空封
武強侯初赤伏符曰王良主衛作玄武上以野王衛
徒也玄武水神也大司空水土之官也乃以梁爲大
司空又以讖言以平狄將軍孫臧行大司馬事衆大
不悅僉曰吳漢景丹應爲大司馬上曰景將軍舊將
是其人也然吳將軍有建策之謀又誅苗曾收謝躬

其功大於是以吳漢爲大司馬封武陽侯景丹爲驃
騎大將軍

袁宏曰夫天地之性非一物也致物之方非一道也
是以聖人仰觀俯察而備其法象所以開物成務以
通天下之志故有神道焉有人道焉微顯闡幽遠而
必著聰明正直遂知來物神之所爲也智以周變仁
以博施理財正辭禁民爲非人之所爲也故將有疑
事或言乎遠必神而明之以一物心此應變適會用
之神道者也辯物設位官方授能三五以盡其性黜
陟以昭其功此經綸治體用之人道者也故求之神
物則著策存焉取之人事則考試陳焉是善爲治者

必體物宜參而用之所以作而無過各得其方矣若夫識記不經之言奇怪妄異之事非聖人之道世祖中興王道草昧格天之功實賴台輔不徇選賢而信識記之言拔王梁於司空委孫臧於上將失其方矣苟失其方則任非其人所以衆心不悅民有疑聽豈不宜乎梁實負罪不暇臧亦無所聞焉易曰鼎折足覆公餗此之謂也上璽書勞鄧禹曰將軍與朕謀謨帷幄決勝千里孔子曰自吾有回門人益親平定山西功效尤著爾作司空敬敷五教禹遂渡汾陰入夏陽更始中郎將公乘欵將十萬衆拒禹於衙禹擊破之時赤眉入關三輔擾亂民無所歸聞禹至衙軍兵

整齊百姓喜悅相隨迎禹降者日以千數號百萬衆
禹時年二十四所止住儀節白首耆老及諸將在軍
下莫不飽滿名震關西八月壬子初祠社稷于懷是
時上新即位軍食不足寇恂轉運不絕百官賴焉以
爲奉上上數璽書勞恂茂陵人董崇說恂曰上新即
位四方未定而以此時據大郡內得人民外破蘇茂
威震遠近此讒人所因怨禍之時也昔蕭何守關中
悟鮑生之言而高祖悅今君所將皆宗族兄弟也無
乃以前人爲鏡戒哉宜從功遂身退之計恂然其言
稱病不親事自請從上征上曰河內未可離也固請
不聽恂乃遣兄子寇張姊子谷崇願爲前鋒上悅然

爲偏將軍廩丘王田立降趙萌李松攻三王三王敗
走更始徙居長信宮三王降赤眉別兵出戰李松拒
之赤眉生得松時松弟汎爲城門校尉赤眉使人誘
汎曰開城活汝兄汎遂開城門九月赤眉入長安更
始出渭濱式侯恭以盆子之立自繫有司赤眉入吏
民奔式侯從獄中出三械見定陶王劉祉解其械言
帝在渭濱遂相隨見更始於舟中弘農太守公乘歛
謂京兆尹解暉曰送帝入弘農我自保之暉曰長安
已敗吏民不可信右輔都尉嚴本恐失更始爲赤眉
所誅卽曰高陵有精兵可往時虎牙將軍劉順定陶
王劉祉尚書任延君侍中劉恭步將更始至高陵嚴

本將軍兵城守外如宿衛內實圍之上聞更始失城
守未知所在詔封更始爲淮陽王敢有害及妻子者
罪大逆其送詣吏者封列侯赤眉更始降者以爲長
沙王過二十日者不受更始知嚴本所守恐其日盡
卽遣劉恭請降赤眉遣大司徒謝祿受之更始於庭
下議殺之式侯與謝祿共請不聽遂更始去式侯舉
刃欲自刎崇等共止之乃捨更始封爲畏威侯式侯
復守崇本求約竟封更始爲長沙王常依謝祿式侯
擁護之頗得與故人賓客相見故人有欲盜更始去
者事發皆繫獄於是祿閉更始自是式侯不得見也
赤眉諸將日會爭功各言所欲封拔劍斫柱稍得王

莽時中黃門數十人皆曉故事頗得差整數日輒復
亂初三輔畏赤眉兵強又見更始降諸縣營長皆遣
使奉獻絡繹道路赤眉兵輒遮殺取其物吏民由是
皆城守上書封拜者不關盆子盆子日夜號泣詣黃
門中共臥起登諸臺榭諸黃門皆哀憐之式侯知赤
眉必敗自恐兄弟俱死即勸盆子歸璽綬教習爲辭
讓語後崇等大會式侯先於衆中跪言諸君共立恭
弟爲君德誠深厚立且一年散亂益甚誠不足以相
成恐死而無益願得兄弟退爲庶人宜更求賢聖今
有君而更求恐賢人不出不如空其位而博選賢聖
唯諸君省察崇等謝曰皆某等罪也盆子因下牀解

璽綬叩頭曰今設爲縣官而爲盜賊如故流聞四方莫不怨恨不復信向此皆非其人之所致也願乞骸骨以避賢兄弟備行伍必欲殺盆子以塞事者無所離死誠冀諸君相哀之耳因涕泣戲欵崇等及郎吏數百人無不感慟崇等下座頓首曰無狀負陛下請自今已後相檢勅不敢放縱因共扶盆子帶以璽綬盆子號泣不得自在崇等旣罷各閉門不出鹵掠三輔聞之翕然百姓爭入長安中市里且滿後二十餘日赤眉貪其財物因大放兵虜掠因縱火燒宮室三王謂謝祿曰三輔營家多欲得更始者一朝失之必合兵攻赤眉不如殺之也於是謝祿使兵殺更始式

侯夜往葬之諸將勸鄧禹取長安禹曰璽書每至輒
曰無與窮赤眉爭鋒今吾衆雖多能戰者少前無可
仰之積後無轉運之饒赤眉新拔長安財富日盛鋒
銳不可當也盜賊羣居無終日計財貨雖多變故萬
端非能堅守長安也上郡北地饒穀多畜吾且休兵
北道就糧養士觀其弊乃可圖也於是引軍北行所
至郡縣皆降頃之積弩將軍馮愔與車騎將軍宗歆
在愔邑爭權愔殺歆與禹相攻上聞之遣尚書宋廣
持節喻降馮愔及更始諸將王匡朝殷成丹等廣至
安邑盡誅之隗囂之奔天水復聚其衆自稱西州大
將軍長安旣壞士人多奔隴西囂虛已接之以谷恭

范逡爲師友趙秉鄭興爲祭酒申屠剛杜林爲治書
王遵周宗楊廣王元爲將帥於是竇融始據河西融
字周公右扶風平陵人也融家貧少時爲驃騎將軍
王舜令史汎愛好交游女弟爲大司空王邑小婦出
入貴戚結交豪傑以任俠爲名然事母兄養弱弟內
行修整漢兵起融從王邑敗昆陽漢兵得新豐邑薦
融可任用莽拜融爲波水將軍賜金千斤引兵新豐
會三輔內潰融降大司馬趙萌萌以融爲校尉絕重
之薦融於更始拜爲鉅鹿太守融見更始立東方擾
攘融祖父爲張掖太守從祖父爲護羌校尉從弟又
嘗爲武威太守累世在河西知其土俗融心樂之獨

謂兄弟曰天下安危未可知河西人民殷實帶河爲固張掖屬國精兵萬騎欲求爲之且以避世一旦有緩急杜絕河津足以自守此真遺種處也兄弟皆勸之融乃辭讓鉅鹿求張掖屬國都尉萌爲言竟得之融大喜遂將家屬而西撫養吏民結雄傑懷集羌胡河西翕然而治是時酒泉太守梁統金城太守庠鈞張掖都尉史苞酒泉都尉竺曾燉煌都尉辛彤皆州郡英俊與融有舊更始欲敗融與統等議皆以爲天下擾亂未知所統河西斗絕在羌胡中不同心并力則不能自守權均力齊又不相率當推一人爲將軍共全五郡觀世變動皆曰善以梁統爲太守先共推

之統固辭曰昔陳嬰不受王者以有老母今統內親老又德能鮮薄不足以當督帥也統字仲寧安定烏氏人少治春秋好法律更始時爲中郎將安集涼州因爲酒泉太守竇融典兵馬又家世爲河西二千石吏民所向卽共推融行河西五郡大將軍事是時武威太守馬期張掖太守任仲二人孤立無黨融等議定移書告喻之卽時解印綬避位於是梁統爲武威太守史苞爲張掖太守竺曾爲酒泉太守辛彤爲燉煌太守融居屬國領都尉如故置從事監察而太守各治其郡尊賢養士務欲得吏民心修騎射明烽燧羌胡犯塞融躬自擊之諸郡相應莫不富殖初更始

遣將軍鮑永撫河東北及并州永好文德雖爲將帥
常儒服從事素重杜陵人馮衍以爲謀主同心戮力
以奉更始上使諫議大夫儲伯持節徵永時或傳更
始猶存永奪伯節執而梏之遣使至長安知更始審
被害乃哭泣盡哀罷兵與衍幅巾詣上上問永衆所
在永離席曰臣事更始不能令全豈可以衆獲貴故
悉罷之上不悅時魯郡多盜賊以永爲魯郡太守降
者數千人唯彭豐虞休各將千人稱將軍不肯降永
數以恩禮曉喻之猶不移孔子闕里荆棘自除從講
堂至里門外永異之召府丞魯令告曰方今世道艱
難而闕里無故荆棘自除意者豈非夫子欲令太守

行饗禮而誅姦惡邪乃求民好學者修學校之禮召
豐等觀禮豐等持牛酒因謀欲害未未覺之手刃殺
豐等擒破黨與封關內侯於是馮衍未得官未謂之
曰昔高祖賞季布之罪誅丁公之功今遭明主亦何
憂哉衍曰人有挑其鄰之妻者挑其長者長者罵之
挑其少者少者報之俄而其夫死而娶其長者或謂
之曰非罵汝邪曰在人之所即欲罵我在我之所即
欲其罵人夫天地難知人道易守守道之臣何患死
乎頃之衍爲曲陽令誅劇賊郭勝等降五千餘人論
功當封以讒不行甲申以故密令卓茂爲太傅封褒
德侯茂字子康南陽人溫而寬雅恭而有禮其行已

處物在於可否之間不求備於人鄉黨老少雖行不
逮茂皆受而容之常有認茂馬者茂問亡馬幾時曰
有日月矣茂解馬與之曰若非公馬幸即歸我後馬
主得馬詣門謝之茂以德行舉為侍郎給事黃門遷
為密令其治視民如子舉善而教口無惡言民常有
言亭長受米肉者茂問之曰亭長從汝求之乎汝有
事囑之受取乎將平居以恩意遺之乎民曰往遺之
而受茂曰遺之而受何故言邪民曰聞君賢明使民
不畏吏吏不敢取民不敢與茂曰汝為蔽民矣凡人
所以貴於禽獸者以其仁愛相敬也鄰伍長老歲時
致禮人道如此乃能勸愛即不如是側目相視怨憎

忿怒所由生也吏固不當乘威力強請求耳誠能禁備盜賊制禦強暴使不相侵民有事爭訟爲正曲直此大功也歲時修禮敬往相見之不亦善乎民曰苟如是律何故禁之茂曰律設大法禮順人情今我以禮教汝汝必無所怨以律治汝汝無所措手足一門之內小者可論大者可殺也且歸念之民曰誠如君言也茂教民制法皆此類也初茂到官吏民皆笑之鄰縣及府官以爲下治河南太守爲置守令茂治自若數年教化大行路不拾遺天下嘗蝗河南二十縣皆傷蝗獨不入密境是時王莽爲安漢公置大司農六部丞勸課農桑茂遷京部丞吏民老小皆啼泣道

路王莽居攝茂以病免常爲郡門下掾不肯爲職吏
更始立以茂爲侍中從至長安知更始政亂以老乞
骸至是年七十餘矣

袁宏曰夫帝王之道莫大於舉賢舉賢之義各有其
方夫班爵以功歷試而進經常之道也若大德奇才
可以充昭王道弘濟生民雖在泥塗超之可也傅巖
磻溪之濱頃居宰相之任自古之道也卓公之德旣
已洽於民聽充武此舉所以宜爲君也吳漢率耿弇
等十將軍圍朱鮪於洛陽數月不下世祖以岑彭常
隸於鮪也使彭說之鮪在城上彭在城下相勞如平
生彭因說鮪曰赤眉已得長安更始爲三王所反今

公爲誰守乎陛下受命平定燕趙盡有幽冀之地百姓歸心賢俊雲集誅討羣賊所向破滅今北方清靜振大兵來攻洛陽正使公有連城之守猶不足當今保一城欲何望乎鮪曰大司徒被害時鮪與其謀誠自知罪深故不敢降世祖曰夫建大事者不思小怨今降官爵可保况誅罰乎河水在此吾不食言彭以告鮪辛卯鮪降以爲平狄將軍扶溝侯冬十月癸丑上都洛陽宮十一月蘇茂降旣而奔劉永永以爲淮陽王十二月赤眉去長安西畧郡縣

後漢光武皇帝紀卷第三



浙江圖書館

浙江圖書館善本


甲 登記號： 32213

一九 年 月 日



浙江圖書館















colorchecker CLASSIC



x-rite



colorchecker CLASSIC



x-rite

100mm